

**LIGJI NR. 08/L - 036**

**PËR DËRGIMIN E FORCËS SË SIGURISË SË KOSOVËS JASHTË VENDIT**

**Kuvendi i Republikës së Kosovës,**

Në mbështetje të Nenit 65(1) të Kushtetutës së Republikës së Kosovës,

Miraton:

**LIGJ PËR DËRGIMIN E FORCËS SË SIGURISË SË KOSOVËS JASHTË VENDIT**

**Neni 1**  
**Qëllimi**

Ky ligj rregullon mënyrën dhe procedurat e dërgimit dhe tërheqjes së Forcës së Sigurisë së Kosovës jashtë vendit.

**Neni 2**  
**Fushëveprimi**

Ky ligj zbatohet për të gjitha rastet e dërgimit të FSK në operacione ndërkombëtare dhe aktivitete tjera ushtarake jashtë vendit.

**Neni 3**  
**Përkufizimet**

1. Shprehjet, termat dhe shkurtesat e përdorura në këtë ligj kanë kuptimin si në vijim:

1.1. **FSK** - Forca e Sigurisë së Kosovës;

1.2. **Operacionet ndërkombëtare**: janë operacionet ndërkombëtare të paqes dhe operacionet ndërkombëtare humanitare;

1.3. **Stërvitjet dhe ushtrimet** - përfshijnë stërvitjet dhe ushtrimet individuale apo grupe të FSK-së jashtë vendit me qëllim të ngritjes së gatishmërisë operacionale para misionit;

1.4. **Personeli i FSK-së** - personeli ushtarak, civil dhe vartësit e tyre të cilët dërgohen në operacione jashtë vendit;

1.5. **Shteti pranues** - vendi në të cilin dërgohet personeli i FSK-së për të realizuar operacionin;

1.6. **Shteti ftues** - vendi i cili fton FSK-në për pjesëmarrje në operacione ndërkombëtare, por që jo domosdoshmërisht është edhe shteti pranues;

1.7. **Marrëveshjet teknike** - janë marrëveshjet, aranzhmanet dhe protokollet teknike për realizimin e aktiviteteve tjera ushtarake jashtë vendit, të cilat janë pjesë integrale e marrëveshjeve bazë.

2. Shprehjet, termat dhe shkurtesat tjera të përdorura në këtë ligj kanë kuptimin sikur në legjislacionin përkatës të kësaj fushe.

#### **Neni 4**

##### **Operacionet ndërkombëtare të paqes**

1. Operacionet ndërkombëtare të paqes janë operacione që kanë për qëllim për të vendosur paqen, për të ruajtur paqen, si dhe për të mbështetur paqen.
2. Operacionet nga paragrafi 1. i këtij neni përfshijnë:
  - 2.1. operacionet e vetëmbrojtjes kolektive, që kryhen në përputhje me marrëveshjet ndërkombëtare, të ratifikuara me ligj e të bazuara në të drejtat e njohura nga neni 51 i Kartës së Kombeve të Bashkuara, ose për të përmbushur detyrime të tjera ligjore;
  - 2.2. operacionet ushtarake, që kryhen për të mbajtur dhe rivendosur paqen, në përputhje me kapitujt VI dhe VII të Kartës së Kombeve të Bashkuara, si dhe operacione të tjera ushtarake, të ndërmarra në përputhje me marrëveshjet ndërkombëtare të ratifikuara me ligj;
  - 2.3. operacionet ushtarake ndërkombëtare të organizuara nga organizata ushtarake të sigurisë, nga shtete apo grup shtetesh.

#### **Neni 5**

##### **Procedurat për pjesëmarrje në operacionet ndërkombëtare të paqes**

1. Dërgimi i FSK-së në operacionet ndërkombëtare të paqes bëhet mbi bazën e marrëveshjeve me shtetin pranues, shtetin ftues, me ftesë të ndonjë organizate ndërkombëtare, apo me ftesë të ndonjërit nga shtetet anëtare të organizatave ndërkombëtare të sigurisë, si dhe me Rezolutë të Këshillit të Sigurimit të Kombeve të Bashkuara.
2. Pas ratifikimit të marrëveshjeve ndërkombëtare sipas paragrafit 1. të këtij neni, me propozim të Qeverisë së Kosovës, Kuvendi i Republikës së Kosovës merr vendim për dërgimin e FSK jashtë vendit në operacionet ndërkombëtare të paqes.
3. Pas vendimit të Kuvendit sipas paragrafit 2. të këtij neni, Presidenti i Republikës së Kosovës autorizon dërgimin e FSK-së jashtë vendit.
4. Propozimi i Qeverisë sipas paragrafit 2. të këtij neni duhet të përmbajë të dhënat si në vijim:
  - 4.1. detyrën e misionit;
  - 4.2. llojin e operacionit;
  - 4.3. vendin e kryerjes së misionit;
  - 4.4. ligjet bazë të kryerjes së misionit;
  - 4.5. numrin maksimal të personelit që mund të dërgohen në këtë mision;
  - 4.6. kohën e zgjatjes së këtij misioni;
  - 4.7. delegimin e autoritetit komandues;
  - 4.8. koston financiare;
  - 4.9. kufizimet në mision.

**Neni 6****Operacionet ndërkombëtare humanitare**

Operacionet ndërkombëtare humanitare përfshijnë operacionet për sigurimin e ndihmës në rast të katastrofave humanitare, teknike, teknologjike ose ekologjike të cilat mund të rrezikojnë shëndetin dhe jetën e njerëzve, pasurisë, ambientit dhe për ofrimin e ndihmës në rast të shkatërrimeve nga lufta ose terrorizmi apo fatkeqësive të tjera.

**Neni 7****Procedurat për pjesëmarrje në operacionet ndërkombëtare humanitare**

1. Dërgimi i FSK-së në operacionet ndërkombëtare humanitare bëhet mbi bazën e kërkesës për ndihmë nga shteti pranues, në bazë të ofertës nga Republika e Kosovës, në bazë të marrëveshjeve ndërkombëtare, me ftesë të ndonjë organizate ndërkombëtare, apo me kërkesë të ndonjërit nga shtetet anëtare të organizatave ndërkombëtare të sigurisë si dhe me ndonjë Rezolutë të Këshillit të Sigurimit të Kombeve të Bashkuara.
2. Vendimin për dërgimin e personelit të FSK - së jashtë vendit për operacionet ndërkombëtare humanitare e merr Qeveria e Republikës së Kosovës me propozim të Ministrit të Mbrojtjes.
3. Kuvendi i Republikës së Kosovës njoftohet menjëherë me vendimin e Qeverisë sipas paragrafit 2. të këtij neni.
4. Pas vendimit të Qeverisë, sipas paragrafit 2. të këtij neni, Presidenti i Republikës së Kosovës autorizon dërgimin e FSK-së jashtë vendit.

**Neni 8****Stërvitjet dhe ushtrimet para misionit**

1. Dërgimi i FSK-së në stërvitje dhe ushtrime për përgatitje për misionin e caktuar jashtë vendit, bëhet mbi bazën e ftesës nga shteti pritës, të bazuar në marrëveshje bilaterale ose në kuadër të ftesës nga ndonjë organizatë ndërkombëtare.
2. Vendimin për dërgimin e FSK-së sipas paragrafit 1. të këtij neni, e merr Ministri i Mbrojtjes.

**Neni 9****Aktivitetet tjera ushtarake**

1. Aktivitetet tjera ushtarake përfshijnë, por nuk kufizohen vetëm në:
  - 1.1. stërvitjet dhe ushtrimet tjera ushtarake;
  - 1.2. arsimimin dhe edukimin;
  - 1.3. garat;
  - 1.4. paradat;
  - 1.5. aktivitetet sportive;
  - 1.6. shkëmbimin e personelit.

**Neni 10****Procedura për pjesëmarrje në aktivitete tjera ushtarake**

1. Dërgimi i FSK-së në aktivitete tjera ushtarake jashtë vendit, bëhet mbi bazën e ftesës nga

shteti pritës të bazuar në marrëveshje bilaterale ose në kuadër të ftesës nga ndonjë organizatë ndërkombëtare.

2. Për pjesëmarrjen e FSK-së në aktivitete tjera ushtarake sipas nenit 9 të këtij ligji, Ministri i Mbrojtjes nxjerr vendim.

3. Marrëveshjet teknike për realizimin e aktiviteteve tjera ushtarake jashtë vendit sipas këtij neni, të cilat janë pjesë integrale e marrëveshjeve bazë, nënshkruhen nga Ministri i Mbrojtjes ose personi i autorizuar nga ai, pa iu nënshtuar procedurave të ligjit përkatës për marrëveshjet ndërkombëtare.

#### **Neni 11** **Ligji i zbatueshëm**

Personeli i FSK-së, gjatë pjesëmarrjes në operacione dhe aktivitete tjera ushtarake jashtë vendit, i nënshtrohet legjislacionit të Republikës së Kosovës dhe të drejtës ndërkombëtare, përveç nëse është përcaktuar ndryshe me Marrëveshje Ndërkombëtare dypalëshe apo shumëpalëshe.

#### **Neni 12** **Delegimi dhe pranimi i autoritetit komandues**

1. Gjatë dërgimit të FSK-së jashtë vendit, Republika e Kosovës mund t'i transferojë pjesë të autoritetit të vet komandantit ushtarak të një shteti të huaj ose një organizate ndërkombëtare, në të njëjtën mënyrë, mund të pranojë një autoritet, që i jepet nga një komandant ushtarak i një shteti të huaj ose nga një organizatë ndërkombëtare, vetëm brenda detyrës së misionit dhe kufizimeve të autorizuar.

2. Autoritetet kompetente për dërgimin e FSK-së në operacione ndërkombëtare jashtë vendit, në çdo rast, në aktin e dërgimit duhet të përcaktojnë misionin dhe mandatin e këtyre forcave.

#### **Neni 13** **Zëvendësimi i personelit**

Zëvendësimi i personelit brenda mandatit të dërgimit bëhet sipas procedurave të përcaktuara me akt të veçantë nënligjor të nxjerrë nga Ministri i Mbrojtjes.

#### **Neni 14** **Procedura për zgjatjen e misionit**

Procedura e vendimit për zgjatjen e misionit të personelit të FSK-së jashtë vendit, bëhet sipas procedurës së njësuar me atë të dërgimit.

#### **Neni 15** **Tërheqja e personelit të FSK-së**

1. Në rastet kur është e nevojshme që të mbrohen interesat e Republikës së Kosovës, në cilëndo kohë bëhet tërheqja e personelit të FSK-së nga misioni.

2. Tërheqja e personelit të FSK-së nga operacionet ndërkombëtare dhe aktivitetet tjera ndërkombëtare ushtarake, bëhet sipas procedurës së dërgimit, e përcaktuar në nenet 5, 7, 8 dhe 10 të këtij ligji.

3. Në rrethana të jashtëzakonshme, vendimin për tërheqjen e personelit të FSK-së nga misioni e merr Presidenti i Republikës së Kosovës.

**Neni 16****Rregullimi dhe procedurat për financim**

1. Mjetet e nevojshme për përgatitje, pajisje dhe dërgim të FSK-së në operacione ndërkombëtare dhe aktivitete ushtarake jashtë vendit të parapara me këtë ligj, përfshirë edhe të drejtat e parapara me paragrafin 2. të këtij neni, sigurohen nga Buxheti i Republikës së Kosovës.
2. Personeli i FSK-së do të kenë të siguruar transportin, pajisjet e nevojshme për operacion dhe stërvitje, sigurimin shëndetësor, sigurimin jetësor, pagat, pagesat shtesë, ushqimin dhe akomodimin.
3. Mbulimi i shpenzimeve të operacioneve ndërkombëtare dhe aktiviteteve të tjera ushtarake të parapara me këtë ligj, mund të bëhet edhe nga organizatat ndërkombëtare dhe nga shtetet veç e veç, mbi bazën e marrëveshjeve ndërkombëtare qeveritare apo marrëveshje ndërkombëtare ndër-institucionale.
4. Zbatimi i paragrafëve 1. dhe 2. të këtij neni do të rregullohet me akt të veçantë të nxjerrë nga Qeveria e Republikës së Kosovës.

**Neni 17****Përkujdesja për personelin e FSK**

Përkujdesja për personelin e FSK para, gjatë dhe pas kthimit, si dhe përkujdesja ndaj familjes së tyre përgjatë misionit, është përgjegjësi institucionale, që rregullohet me akt të veçantë nënligjor të nxjerr nga Ministri i Mbrojtjes.

**Neni 18****Zbatimi i procedurave doganore për kalimin e kufirit**

1. Dogana e Kosovës sipas legjislacionit doganor në fuqi, aplikon procedurën standarde të export-importit për të gjitha mallrat dhe pajisjet në rastin e kalimit të kufirit nga Forcat e Sigurisë së Kosovës, për qëllime të pjesëmarrjes së tyre në operacione ndërkombëtare dhe aktivitete tjera ushtarake jashtë vendit.
2. Në zbatim të paragrafit 1. të këtij neni, Ministria përkatëse e Financave në konsultim me Doganën e Kosovës, nxjerr akt nënligjor përmes së cilit përcaktohet procedura që duhet ndjekur gjatë deklarimit të mallrave/pajisjeve të FSK-së, si dhe mënyra e aplikimit të lehtësirave procedurale të kalimit të kontrollit doganor.
3. Kalimi i kufirit të vendeve tjera përcaktohet me marrëveshjet e operacionit.

**Neni 19****Përgjegjësitë e Ministrit të Mbrojtjes dhe Komandantit të Forcës së Sigurisë së Kosovës për dërgimin e FSK-së jashtë vendit**

1. Ministri i Mbrojtjes është përgjegjës:
  - 1.1. t'i propozojë Qeverisë së Kosovës planin dhe financimin e nevojshëm për aktivitetet e FSK-së në operacionet jashtë Kosovës;
  - 1.2. të vlerësoj dhe të vendosë fillimin e procesit të planifikimit;
  - 1.3. nëse kërkohet, të raportojë për procesin e dërgimit para Kuvendit të Republikës së Kosovës.
2. Komandanti i FSK-së është përgjegjës për organizimin, trajnimin dhe pajisjen e FSK-së në

mënyrë që të përmbushen kërkesat e dërgimit jashtë vendit, si dhe përkujdesjen dhe monitorimin e pjesëtarëve gjatë misionit jashtë vendit.

3. Procedurat e dërgimit të FSK-së në operacione ndërkombëtare dhe aktivitetet tjera ushtarake përfshinë: planifikimin, përgatitjen, stërvitjen trajnimin, dhe gatishmërinë e FSK-së për dërgim jashtë vendit. Procedurat e dërgimit, tërheqjes, zëvendësimit dhe trajtimit pas kthimit, do të përcaktohet me akt të veçantë nënligjor të nxjerrë nga Ministri i Mbrojtjes.

#### **Neni 20 Raportimi**

1. Pas përfundimit të misionit të FSK-së, në operacione ndërkombëtare të paqes dhe humanitare dhe sipas kërkesës, komandanti i FSK-së përgatit raport për presidentin/en dhe ministrin e Mbrojtjes.

2. Ministri i Mbrojtjes, pas përfundimit të misionit të FSK-së, në operacione ndërkombëtare të paqes dhe humanitare dhe sipas kërkesës, përgatit raport për Qeverinë dhe Kuvendin e Kosovës.

#### **Neni 21 Nxjerrja e akteve nënligjore**

1. Aktet nënligjore të parapara me këtë ligj nxirren në afat prej më së largu një (1) vit nga hyrja në fuqi e këtij ligji.

2. Aktet nënligjore që janë në fuqi vazhdojnë të zbatohen, deri në nxjerrjen e akteve të reja nënligjore, me kusht që të mos jenë në kundërshtim me këtë ligj.

#### **Neni 22 Dispozita shfuqizuese**

Me hyrjen në fuqi të këtij Ligji shfuqizohet Ligji Nr.04/L-177 për Dërgimin e Forcës së Sigurisë së Kosovës Jashtë Vendit.

#### **Neni 23 Hyrja në fuqi**

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 08/L-036  
13 dhjetor 2021**

**Shpallur me dekretin Nr. DL-200/2021, datë 24.12.2021 nga Presidentja e Republikës së Kosovës Vjosa Osmani-Sadriu**